



Brčko: Zajednička odricanja u budžetu danas znače zajednički prosperitet nakon pandemije

Supervizor za Brčko Distrikt, Michael Scanlan, pozdravlja diskusiju među političkim rukovodstvom i poslanicima Skupštine o moratoriju na nova zapošljavanja u javnom sektoru sve dok se ne uspostavi transparentniji postupak zapošljavanja.

„Dobar i transparentan postupak je situacija u kojoj svi dobijaju. Sa takvim postupkom, građani mogu biti sigurni da su dobili najbolje ljude za pružanje javnih usluga, dok javni službenici ne moraju više dolaziti u poziciju da im se kvalifikacije osporavaju jer su već prošli odgovarajuće provjere kroz otvoren, pošten i transparentan proces. Transparentnost jača povjerenje u kvalitet javnih usluga, nešto što građani Distrikta zaslužuju i što istovremeno šalje signal investitorima da je Brčko dobro mjesto za poslovanje“, naglasio je supervizor.

Dok je pandemija covid-19 još uvijek u jeku, vlasti trebaju ostati fokusirane na održavanje javnog zdravstva i ublažavanje ekonomskih posljedica, dok istovremeno rade na tome da Brčko bolje pozicioniraju za ubrzan rast radnih mjesta u privatnom sektoru čim pandemija završi. Svaka marka u budžetu Distrikta mora se pametno rasporediti kroz ovu prizmu, pri čemu je jučerašnji nacrt budžeta, na kom se još radi, korak ka tom cilju.

„Prevladavanje trenutnih izazova i provođenje reformi koje su Brčkom neophodne za bolju budućnost zahtijevat će zajednička odricanja i solidarnost. Samo zajedno, zajednica će se oporaviti od pandemije i uživati u kolektivnim prednostima novog reformskog trenda“, dodao je supervizor.

U tom kontekstu, supervizor pozdravlja opredjeljenje Skupštine Distrikta da zakone usvaja samo kroz redovnu proceduru, s dovoljno vremena za raspravu i reviziju. Hitni postupak treba ostaviti samo za rijetke vanredne situacije.

Također, resurse Brčkog ne smiju crpiti oni koji nemaju prebivalište u Distriktu, a kontrola prebivališta provedena u posljednjim mjesecima 2020. trebala bi poslužiti za identificiranje i uklanjanje iz sistema onih koji nezakonito

primaju socijalnu pomoć ili druge beneficije u Brčkom.

U naredne dvije sedmice supervizor će se sastati sa šefovima klubova zastupnika i predstavnicima nacionalnih manjina u Skupštini Brčko Distrikta. Prva serija sastanaka održana je u četvrtak i petak, kada se sastao sa šefovima klubova SP-a, HDZ-a BiH, Ujedinjene Srpske, SBiH, SDA, PDP-a i SNSD-DEMOS-a. Prvi održani sastanak u četvrtak bio je sa gradonačelnikom, zamjenikom gradonačelnika, predsjednikom i zamjenikom predsjednika Skupštine.